

La casa dalla Regiun s'empleina


La Scola da musica Surselva a Glion mida domicil

DAD AUGUSTIN BEELI / ANR

■ **Dapi rodund 20 onns ha la Scola da musica Surselva a Glion in liug d'instrucziun central ella casa dalla Swisscom sut il spital. Naven digl onn da scola 2017/18 duess ei dar ina midada. La damonda da baghegiar ei exponida actualmein.** Il dossier culs acts ei publicaus dapresent en Casa Cumin a Glion. Vendergis vargau han ins saviu prender notizia el Fegl official che la Regiun Surselva ha en vesta in project en siu domicil alla Via dil Glogn 22 a Glion. Igl ei previu da scaffir plaz adattau per la Scola da musica Surselva. Avon dus onns ha l'organisaziun regiunala cumprau dalla Repower la vasta casa cun tract administrativ, ils biros dalla tecnica ed ils luvratoris el plaun sut. Igl entir complex haveva surviu dapi ils onns siatonta sco domicil dall'Overa electrica sursilvana respectiv dall'Aurax. Tras la vendita da quell'interpresa fuvu ella daventada la casa dalla Repower.

Dalla centrala da telefon...

Damai che lezza ha baghegiu in agen luvratori cun biros alla Via Santeri ella zona d'industria a Glion ei quella casa administrativa sesvidada. E dapi dus onns s'empleina ella puspei. Tec a tec han las instituziuns regionalas priu domicil alla Via dil Glogn 22. La Regiun Surselva sco nova proprietaria ha saviu plazzar en quei baghetg la gronda part da ses biros e survetschs. En quei liug central eis ei gartegiau da scaffir ina vera «casa dalla Regiun». Naven digl onn da scola 2017/18 vegn era la scola da



Las biaras instituziuns ein gia domiciliadas ella casa dalla Regiun a Glion. Ussa duei era la Scola da musica Surselva retscheiver plaz en quei liug. FOTO A. BEELI

musica vitier. Actualmein frequentan varga 800 scolaras e scolaras las lecziuns tier la Scola da musica Surselva. Pli che 40 persunas instrueschan en varga 30 loghens d'instrucziun, la purschida cumpeggia rodund 20 differents instrumens.

Il sistem decentral vegn a restar sco tochen dacheu. Era egl avegnir ston buca tut ils scolaras vegnir a Glion aposte per emprender da sunar clavazin, accordeon, flauta, instruments da stuors ni tschels che la Scola da musica Surselva porscha. El futur drova la scola denton buca pli la casa dalla Swisscom sut il spital. All'entschatta dils onns siatonta haveva la direcziun circuitala da telefon baghegiu quei implont sco centrala da telefon. Egl intern digl edifices funcziunal en fuorma d'ina scatla da calzers gigantica sesanflavan las grondas scaffas culs relais da distribuziun. Alla fin dils onns navonta ha lu la digitalisaziun remplazzau la mecanica aschia ch'igl implont a Glion ei staus danvonz. Per la Scola da musica Surselva eis ei stau ina buna caschun, ella ha anflau leu ina basa per ses dievers. La sligiazion optimala eis ei denton mai stau.

... ella casa dalla Regiun

Il project che la Regiun Surselva vul usa realisar el plaunsut dalla «casa dalla Regiun» duei porscher quella sligiazion optimala. Igl entir schischom dalla parcella dalla Regiun ha ina surfatscha da 3172 m². Leutier s'audan era la cuort davostier encounter il Paradieswäldli ed igl areal dalla scola. Gest sill'altezia da quella cuort ha ei stanzas che la Repower

duvrava buca pli. Che quellas s'adateschan pil diever dalla scola da musica haveva la suprastanza dalla Regiun viu dalla bial'entschatta. Ussa vegn l'idea concreta.

Tenor la documentaziun ch'ei exponida dapi vendergis en Casa Cumin a Glion san ins veser ch'il plaunsut vegn midaus en stanzas per l'instrucziun da musica. Els plans indichescha igl architect quellas stanzas sco «boxas da musica». Mintgina dallas otg «boxas» ha ina surfatscha dad 11 m² ed ei drizzada encounter sid. Las finiastras grondas cun veider da sisum tochen giudem garenteschan glich avunda ed atmosfera. Quater dallas stanzas unitaras han preits fixas. Il scolast ni la scolasta san dar lecziuns singulas ni prender ensemen scolaras.

Ina saletta nova per concerts

Tier las autras quater stanzas veggnan las preits da betun ruttas ora e remplazzadas cun preits moviblas. Era quellas ein adattadas per lecziuns singulas ni en gruppas. Grazia allas preits che selaijan arver sco in accordeon san ins midar las quater stanzas en ina saletta. Las persunas d'instrucziun san organiser cheu concerts e porscher plaz a 40 persunas. Sper las otg «boxas da musica» include il project silla medema alzada aunc duas stanzas d'exercezi da mintgamai 25 m², ina gardaroba sco era ils indrezs sanitaras. Igl access allas stanzas d'instrucziun ella casa dalla Regiun vegn ad esser pusseivels dall'entrada principala alla Via dil Glogn 22 ni dalla vart dalla cuort.

Marc Lardon e Daniel Seiler rescann Bach

■ **(anr/ac) Els sez han definiu lur interpretaziuns ed arranschaments dalla musica da Johann Sebastian Bach per particulara e riscada. Principalmein pervia dalla instrumentaziun nunusitada.** Marc Lardon sededichescha alla clarinetta cuntrabass e Daniel Seiler al cuntrabass. Gievgia proxima ein els dad udir e veser sin la tribuna dil Cinema Sil Plaz. La musica da Johann Sebastian Bach accompogna ils dus musicists *Marc Lardon* e *Daniel Seiler* tenor atgnas indicaziuns dapi

l'entschatta da lur activitads musicalas. Els han titulau quella musica per lur «paun da mintgagi». Ed a quei paun da mintgagi s'avischinan Lardon e Seiler a moda cumpleinamein nunusitada. Lur arranschaments ed interpretaziuns dalla musica da Bach cun il cuntrabass e principalmein cun la clarinetta cuntrabass valereschan ils dus musicists sez per acziun particulara e buca senza rescada. En quella fuorma tuna la musica da Bach empau da tempru nunusitada era pervia dalla pli bassa tonalitat. Ils dus

musicists han elavurau ord cantatas, l'ovra da clavazin e concerts da Bach in program che garentescha ina sera musicala da tempru speciala. La preferenza per ovras grevas e dramaticas dils dus protagonistis vegn, neu dall'interpretaziun instrumentala, accentuada. Ella ei dad udir gievgia proxima, ils 26 da schaner a Glion nua che Lardon alla clarinetta cuntrabass e Seiler al cuntrabass ein dad udir e veser sin la tribuna dil Cinema Sil Plaz. Il concert entscheiva allas 20.15.



Musica da Bach via ina instrumentaziun nunusitada da Marc Lardon e Daniel Seiler el Cinema Sil Plaz. MAD

■ SURSAISSA

Varga 400 affons e juvenils al Grand Prix Migros

(anr) La davosa fin d'jamna ein 401 affons e juvenils separticipai a Sursaisa alla quarta cuorsa da selecziun dil Grand Prix Migros 2017. Ils treis pli sperts da mintga categoria han saviu segirar lur participaziun al final l'entschatta avrel ad Adelboden. Las skiunzas ed ils skiunzs ella vegliadetgna denter otg e 16 onns ein semesirai sin la pista d'Untermatt a Misanenga. Las Grischunas ed ils Grischuns han dominau cumpleinamein la cuorsa. Buca meus che 28 han contonschiu in plaz da podest. Sin la pista gronda ei *Will*

Cashmore dall'annada 2001 da Sursaisa staus il pli spert, ferton che *Selina Egloff*, medemamein dall'annada 2001, ei stada la pli sperta dallas giunvas. Sin la pista pintga ei *Pia Veraguth* dall'annada 2007 da Vuorz stada la pli sperta dallas buobas. *Andres Vidal* dall'annada 2007 da Santander (Spagna) ei ius cun la plema tiels buobs. La proxima cuorsa da selecziun ha liug dumengia proxima, ils 29 da schaner 2017 a Grindelwald/Wengen.

Ulteriuras informaziuns www.gp-migros.ch

■ MUMPÉ MEDEL

13avla cuorsa da scursolas e sluias

(anr/hh) Dumengia proxima, ils 29 da schaner 2017 ha la 13avla cuorsa da scursolas e sluias da corns liug a Mumpé Medel. A quei arranschament da concurrenza, mo era da divertiment, envida l'Uniuin da scursalar e spassegiar Mumpé Medel. La partenza dalla cuorsa ei a Val da Runs allas 11.30. Quella po vegnir contonschida naven dil vitg en rodund 40 minutas. L'uniun porscha duas categorias d'affons, ina categoria da dunnas ed ina d'umens. La rangaziun ei allas 14.30 el vitg. Ils organisaturs supplicheschan da s'annunziar entochen sonda, ils 28 da schaner 2017 allas 20.00. Quei ei pusseivel da far sin la homepage www.la-scursalada.jimdo.com, per telefon 081 947 40 20 a *Jacinta Jacomet-Lombriser* ni per mail jacintajl@bluewin.ch. Sin la homepage ein era ulteriuras informaziuns sco era il reglament dalla cuorsa da catter. Datum da reserva per la cuorsa en cass da schliatas relaziuns ei dumengia, ils 19 da fevrer 2017.

reclama



Martin Candinas
Nationalrat CVP
Rabius/Chur

“Der NAF fördert das Zusammenspiel der Verkehrsträger.”

www.NAF-ja.ch

Am 12. Februar
JA
zum NAF

So fährt die Schweiz gut.

Komitee-ja zum NAF, Postfach 381, 7001 Chur